

Sakspapir

Saksnr	Utvalg	Type	Dato
011/21	Kommunestyret	PS	18.02.2021

Saksbehandler	Arkiv	ArkivsakID
Ketil Tjore	FE-033	21/127

Orienteringssak

Framlegg til vedtak:

Kommunestyret - 011/21 - 18.02.2021

KS - behandling:

Dagleg leiar i Nordhordland Næringslag, Baste Tveito, orienterte om Greenspot Mongstad. Selskapet er pådrivar for satsing på hydrogenproduksjon, batterifabrikk, og andre nye næringar. I samband med dette vert det jobba med å auka straumtilførselen til Mongstad, først gjennom å auka kapasiteten på dagens nett frå 300 til 420 kilovolt, og i neste omgang med ny straumtilførsel frå Modalen eller Samnanger. Vil spela inn ulike tiltak for å auka straumtilgangen på Mongstad, anten ved sjøkabel til Mongstad/Kollsnes, eller å skyva på elektrifisering av sokkelen som vil krevja mykje straum, og til sist ved å ikkje demontera energiverk Mongstad, som er planlagt nedlagt frå hausten.

Nordhordland Næringslag vil 22. mars vil ha eit webinar om framtida for næringslivet.

Einingsleiar teknisk drift, Rolf Henning Myrmel, orienterte om varmeanlegget på Kystbarnehagen og ved Kaland skule. Ved Kystbarnehagen har det vore mange feil frå starten av. Men hovudentreprenøren hadde organisert seg slik at ansvaret var hjå underleverandørar, og desse gjekk konkurs før dette var mogleg å krevja retting for.

Hadde tidleg problem med lekkasje på varmeanlegget, der ein måtte meisla opp golv for å retta, og fekk hovudentreprenør Trygge barnehager til å kosta ein del arbeid, men dette var ikkje fullført, og den utførande gjekk konkurs. Har no eit anlegg som ein ikkje får justert slik ein vil, og det er mistanke om at sjølv om dokumentasjonen er OK så virkar det som anlegget aldri er innjustert.

I 2020 henta ein inn Lindås Rør og Sanitær som tok ein gjennomgang på anlegget, der er konklusjonen at fyrrommet må byggast om, med meir, til ein kostnad på 140.000 pluss deler og elektro, og etterpå ei innregulering til 120-150.000 kroner.

Har vidare problem med ventilasjonen, same historie der. Utførande entreprenør har gått konkurs, og det er grunn for å tru at anlegget ikkje er innregulert slik det skal. Har hatt firma ute for å sjekka, dei konkluderer med at det er ubalanse i anlegget, og at det aldri har vore innregulert. Manglande regulering gjev over/undertrykk i rom til rom, og dermed kjensle av at det er trekk. Ei innregulering er kalkulert til 90.000 kroner. Det er store kostnader, men skal ein få utnytta varmepumpe og få eit best mogleg inneklima er dette kostnader som ein må ta. I den fasen kommunen har vore inne i økonomisk har det ikkje vore rom for å ta denne type ting, men håpar det skal vera rom no.

Ordførar Per Lerøy (Ap) sa at dette må ein berre ordna så raskt som mogleg, for i dag vert Kystbarnehagen varma opp med elektrisk straum, og ein får ikkje nytta energibrønner.

Monika Thorpe (Ap) spurte om korleis det fungerer med eigenkontroll, og fekk til svar at det no er slik at det er utførande sjølv som driv kontroll. Hardy Pedersen (Ap) stadfesta at det no fungerer slik at det er utførande sjølv som signerer på at det er OK.

Monika Thorpe (Ap) spurte om ein kan forsikra seg mot slike tilfelle. Rolf Henning Myrmel svara at kommunen heldt att ein mindre sum av betalingssummen, og det gjorde at noko ekstraarbeid vart ordna. Ser at Trygge barnehagar har organisert seg slik at dei ikkje har ansvar, det er ein lærdom å ta med seg.

Reidar Øksnes (Sp) spurte om kva kommunen kan læra av dette. Øksnes sa vidare at denne utbetringa kanskje burde vore prioritert høgare under ekstraltdelingar i desember 2020, dersom dette var kjent då, og viste til ekstraløying til idrettshallen.

Per Lerøy svara at det ikkje vert rett å setja desse opp mot kvarandre, sidan idrettshallen ikkje var godkjent. Ser elles at Trygge barnehagar hadde gode referansar, men dei har bygd dei fleste barnehagane til seg sjølv.

Britt Lerøy (Ap) spurte om tilgang til prosjektet undervegs, og Rolf Henning Myrmel svara at det var organisert annleis i dette byggetilfellet.

Aslak Bakke (H) spurte om korleis ventilasjonsanlegget fungerer, Rolf Henning Myrmel svarte at det har fungerer ei stund og så går ut, og noko er påverka av ute-temperatur.

Einingsleiar teknisk drift, Rolf Henning Myrmel, orienterte om ventilasjonen på Kaland skule. Det er for liten kapasitet på borehola, treng fire hol til for å få nok kapasitet til å varma opp. Er også for lite kapasitet på straumanlegget på skulen, manglar 80 kilowatt for å drifta anlegget skikkeleg. Det ventilasjonsanlegget som er bygd er ikkje dimensjonert etter energien som er tilgjengeleg på skulen. Må ha meir straum inn for å ta ut kapasitet. Trur kostnaden er oppunder 500.000 kroner, og det er utan kostnad til å auka straumkapasiteten.

Ordførar Per Lerøy (Ap) viste til at krava til ventilasjon har auka siste åra, det gjer at anlegget må vera større sjølv om skulen ikkje er større.

Rådmann Bjørnar Fjellhaug sa at ein kan ta noko i samband med andre tiltak som skal gjerast på Kaland.

Reidar Øksnes (Sp) spurte om tilgang på straum. Hardy Pedersen (Ap) sa at skulen ikkje får ta ut meir enn 720 ampere av trafoen i kjellaren på skulen. Dette er ein trafo på 800 ampere som skulen deler med 5-6 hus i nabolaget, her kan BKK ta over desse husa til anna forsyning, eller bytta trafo.

Ordførar Per Lerøy (Ap) sa at ein må gjera ting skikkeleg med ein gong, det er erfaringa ein må ta av

dette.

Anne Dahle Austrheim (KrF) spurte om kvifor dei eksisterande borehola ikkje er nok, Rolf Henning Myrmel svara at vannbåren varme vert brukt til meir enn tidlegare, slik at kapasiteten ikkje er tilstrekkeleg.

Reidar Øksnes (Sp) sa at det må vurderast om utbetringar er drift eller investering .

Ordførar Per Lerøy (Ap) sa at dette arbeidet må gjerast, det er skuleborn som går der og arbeidsplassen for folk. Dette må prioriterast, kan ikkje ha det slik som ein har i dag.

Konstituert rådmann Bjørnar Fjellhaug sa at det er gjort ein god jobb i med å snu økonomien i kommunen, stadfesta av god omtale i Kommunal Rapport i dag.

--

Konstituert rådmann Bjørnar Fjellhaug sa at ei sak om nye satsar frå Soknerådet kjem via formannskapet til kommunestyret i neste møterunde.

Konstituert rådmann Bjørnar Fjellhaug sa at det kjem sak til formannskap og kommunestyre om digitalisering av kommunestyremøta (KommuneTV). Har elles oppgradert møterom på kommunehuset.

Konstituert rådmann Bjørnar Fjellhaug orienterte om Covid19-statusen. Ingen nye smitta per no, etter at ein for halvanna veke sidan hadde ein smitta med mutant-virus. KKL vedtok då ei forskrift lik andre omegnskommunar, og har den siste veka i vore inkludert i den nasjonale forskrifta om Korona-tiltak i det som er omegnskommunane rundt Bergen.

Inger Lise Brekke (H) spurte om det er rett at det er 2 meter avstand, meiner det er skulle vore ein meters avstand. Fjellhaug svara at dette skal følgjast opp.

Monika Thorpe (Ap) spurte om antalsavgrensinga på ungdomsklubben med 20, påmelding med meir, og sa at dette vert opplevd som ganske strengt, og at ungdommane har det vanskeleg på mange sett i desse tider.

Ordførar Per Lerøy (Ap) sa at ein må hugsa at ein har vore veldig flinke og ikkje fått smitte inn i institusjonar og skular, og Bjørnar Fjellhaug la til at Austrheim er ein sårbar kommune der det vil slå sterkt ut dersom smitten kjem inn. Kommunalsjef helse og omsorg Monika Kvamme sa at ein er ferdig med vaksining av dei på sjukeheimen, i gang med dei i aldersgruppa frå 75 til 84, og også har vaksinert ein del helsepersonell på ulike einingar. Veit berre på kort varsel kor mange dosar med vaksine ein har tilgjengeleg. Har så langt testa rundt 1.280 personar. Ordførar Lerøy viste til at der gjort kontrollar og informasjonsrunde til butikkane for å sikra at tiltaka er på plass.

Konstituert rådmann Bjørnar Fjellhaug orienterte om at Alver barnevern melder om noko opprydding på vedtak og dokumentasjon etter overgangen til Alver, dette arbeidet skal vera avslutta til juni. Avvika som var meldt tidlegare, er lukka. Har fått ned kostnadene noko i 2020, med eit lite mindreforbruk. Er elles på gang ein ny barnevernsreform frå 2022, denne vil rådmannen komma tilbake til seinare. Vil også få informasjon direkte frå barnevernsleiar i Alver. Status siste halvår 2020 er 18 meldingar til barnevernet, 18 barn i hjelpetiltak totalt, og tre mellom 18 og 23 år.

Kommunalsjef personal og økonomi, Odd Harald Dommersnes, orienterte om førebelse

rekneskapstal for 2020. Auka VA-avgifta meir i 2019 enn ein klarte å bruka, og det er sett av 2,4 millionar kroner på fond for dette. Er også avsett midlar til den forpliktinga som ein har for legane sin opparbeidde utdanningspermisjon, dette vert det sett av midlar til årleg framover. Må ha fokus på gjennomføring av budsjetta, kanskje betre med mindre prosjekt der ein klarer å levera på desse. Må vera slik at leverandørar fakturere løpande, ser i dag at det er komme faktura nesten eit år etter leveransen.

Ordførar Per Lerøy (Ap) sa at ein må bli betre på å gjennomføra vedtekne investeringar. Her ser ein at det er leigd inn prosjekteringskompetanse, men har ikkje klart å gjennomføra prosjekt, som det på VA med pumpestasjonen i Åråsvågen der det renn over.

Reidar Øksnes (Sp) spurte om det er nok tilsette til å gjennomføra og følgja opp prosjekt som ein set i gang. Når politikarane har fromme ønskje, må ein syta for at det er nok folk, anten innleigde eller eigne folk. Om skatteinngangen viste Øksnes til at det i Korona-året er mange med adresse lokalt som har jobba ekstra, framfor innleigd personell frå utlandet. Skatteinngangen i 2020 kan ein ikkje forventa skal vara ved.

Aslak Bakke (H) spurte om potten som er brukt til Dagsturhytta på Vardetangen. Odd Harald Dommersnes svara at potten no viser kva dette har kosta kommunen per no, men dette vert motrekna mot det som ein får i spelemidlar i år og kommande år, slik at dette vert redusert framover.

Aslak Bakke (H) spurte om status for VA-prosjekt burde vore oftare oppe i kommunestyret, med tettare oppfølging? Om dette svara ordførar Per Lerøy (AP) at tett oppfølging er viktig, må komma i gang med 2021-prosjekt rundt påske skal ein klara å komma i mål i år. La til at ein burde tatt meir av utbygginga vassleidningen i same runde som det som er utført, heller enn å ta det stykkevis og delt.

Hege Ramsland (H) spurte om når Vardebrua skal vera på plass, Per Lerøy (Ap) svara at det var sagt utgangen januar, men ser no at dette ikkje har skjedd.

Handsaming i kommunestyret:

Samrøystes for å ta orienteringane til vitande.

KS - vedtak:

Orienteringane vert teke til vitande.

Saksopplysninger: